



*Selasa, 19 Maret 2024*  
**Ogen: Kuan-kuanen 20:28**



**Ulih Setia**



**S**ekali jadi sekalak raja erbahan sada pertandingan man anak perana i bas negrina. Si jadi pemenang pagin i bas sayembara e ijadiken jadi pangeran si ngempoi anakna. E maka kerina anak perana pe ergiah-giah guna mpesikap dirina ngikuti sayembara siniibahan raja e. Melala rungga sinialaken i bas pertandingan e, melala ka si talu janah i bas paksana tading me dua kalak nari si ertanding. Si dua kalak ipertandingken ka me segelah idatken ise kin si jadi sang juara. I bas pertandingan si pepudi e ibereken raja me man teptep anak perana 2 biji sinuan-sinuan. Aturen pertandingan maka biji e isuanken janah kenca isuan ibereken me kari ulihna man raja. Minter duana anak perana enda mulih kurumahna, janah nuanken biji e ku bas sada pot. Kenca dua bulan seh me paksana duana anak perana e ngadap ku raja maba ulih pendahinna sedekah enda. Anak perana si pemena ibabana me pot risiken sinuan-sinuan si meratah, mejile dengen mbur. Nina " raja, biji siniberekenndu ndube enggo ku suanken ku siram dengen kurawat seh maka ulihna sinuan-sinuan si mejile enda" megi ras ngidah si e, maka kerina pejabat raja pe tedis mereken tepuk tangan ngatakan maka anak perana enda tuhu-tuhu mehuli. Kenca si e, bengket ka me anak perana si peduaken. Ibabana me sada pot, isi taneh janah la lit turah sinuan-sinuanna. Nina " raja, biji siberekendu ndube enggo kusuan, tiap wari kuperdiateken janah ku siram, tapi seh dua bulan enda la lit turah arah bibit enda nari" megi ranan enda tawa me kerina pejabat raja. I bas tawana pejabat e, tedis raja, janahna nina man anak perana si peduaken " kam kap calan pangeran e, man bandu ku endesken anakku sidiberu..." kemamangen kerina si megi ranan raja e. Iterusken raja erbelas nina " biji e enggo ku tanggerken janah ku kerahken ka mulihi, e maka payo labo banci turah" Arah turi-turin enda nuduhkan maka kesetian e kawiten ras kejujuren, kebujuren. Kuan-kuanen ngatakan maka kalak si bujur ras setia tetap ngaloken kuasa. I bas paksana tetap menang dengen ipehaga kap. Ia me emas si meherga dengen ipehaga.

✎ *"Tetap jujur mereken ulih kesetian bas paksana"*



